

Evening Dogri (NSD) Bulletin 09-07-2024

आकाशवाणी

खास खबरां

- 1 प्रधानमंत्री नरेन्द्र मोदी होरें मेद प्रगट कीती जे औने आले ब'रें च भारत रूस रिश्तें होर मजबूत होंगन। श्री मोदी होर हर चाल्ली दे आतंकवाद दी निंदेआ कीती।
- 2 प्रधानमंत्री मोदी होरें आखेआ जे सरकार दा त्रीय कार्जकाल गी विश्व च बी सब्बने शा बड्डी अर्थबवस्था बनाने दा लक्ष्य ऐ।
- 3 राष्ट्रपति द्रौपदी मुर्मू, रक्षामंत्री राजनाथ सिंह होरें आतंकवादी हमले च 5 भारतीय फौजी जुआनें दे शहीद हाने पर डूंहगा दुख ते बसोस प्रगट कीता।
- 4 शिक्षा मंत्री धर्मेन्द्र प्रधान होरें राज्यें ते केन्द्र शासत प्रदेशों गी सांझी शिक्षा प्रणाली बनाने लेई किट्ठे कम्म करने दा आह्वान कीता ऐ।
- 5 विशेष जांच टीम आस्सेआ सोंपदी दी रिपोर्ट दे बाद उत्तर प्रदेश सरकार नै हाथरस भगदड़ मामले च 6 अधिकारिएं गी मुअत्तल करी दित्ता ऐ।

<><><><><><><>

PM-Putin Meeting

प्रधानमंत्री नरेन्द्र मोदी होरें भरोसा जताया ऐ जे औने आले ब'रें च भारत ते रूस दे सरबंध होर निग्गर होंगन। अज्ज रूस दे राष्ट्रपति ब्लादिमीर पुतिन हुंदे कन्नै अपनी बैठक दरान उनें आखेआ जे पिछले कोई 10एं ब'रें च एह बलादिमीर पुतिन हुंदे कन्ने उंदी 17मीं मलाटी ऐ ते पिछले 25एं ब'रें च 22 दपक्खी बैठक। प्रधानमंत्री होरें आखेआ जे एहदे नै उंदे सरबंधें दी गैहराई दा पता लगदा ऐ। उनें आखेआ जे पिछले 40एं –50एं ब'रें दा भारत आतंकवाद दा मकाबला करा करदा ऐ ते इस करियै जिसलै रूस च कोई आतंकी हमला होंदा ऐ तां ओ

ओहदी तकलीफ बी समझी सकदे न। मोदी होरें हर चाल्ली दे आतंकवाद दी सख्त निंदेआ कीती। उनें आखेआ जे पिछले 5एं ब'रें दरान दुनिया गी केई चुनौतिएं दा सामना करना पेआ ऐ जियां जे कोरोना महामारी ते ओहूदे बाद केई गतिरोध। मेदी होरें भारत रूस सैहयोग दी सराहना करदे होई आखेआ जे एहूदे नै भारतीय करसानें ते उपभोक्ताएं गी फायदा पुज्जा ऐ। उनें आखेआ जे जिसलै दुनिया गी तेल-पेट्रोल दा संकट दरपेश हा उसलै रूस दे समर्थन कन्ने भारत दी मदद होई ते भारत दे लोकें गी दुनिया दे बाकी देशों आंगर तेल दी मैंहगाई दी मार दा सामना नेई करना पेआ। उनें आखेआ जे विश्व गी एहू स्वीकार करना लोड़चदा जे भारत-रूस बश्कार इंधन सरबंधी समझौते नै अंतर्राष्ट्रीय बजारें च स्थिरता आन्नने लेई बड्डी भूमका नभाई ऐ।

<><><><><><>

PM-Indian Community

प्रधानमंत्री नरेन्द्र मोदी होरें आखेआ ऐ जे सरकार दा लक्ष्य अपने त्रीए कार्जकाल च भारत गी दुनिया दी त्रीह बड्डी अर्थबवस्था बनाना ऐ। रूस दी राजधानी मास्को भारतीय समुदाय गी संबोधत करदे होई मोदी होरें आखेआ जे अज्ज दा भारत जेहड़ा बी नशाना मित्थदा ऐ जां लक्ष्य तैह करदा ऐ उसी पक्का गै हासल बी करदा ऐ। उनें आखेआ जे त्रीह बारी सरकार गठन दे बाद प्रवासी भारतीय समुदाय कन्ने एहू उंदी पैहली मलाटी ऐ। प्रधानमंत्री होरें आखेआ जे उनें इस गल्लै दा धेइया कीते दा ऐ जे ओ अपनी सरकार दी त्रीए कार्जकाल दरान त्रै गुणा मती ताकत ते त्रै गुणा मती रफतार कन्ने कम्म करगंन। उनें गलाया जे अज्ज भारत विश्व गी डिजीटल लैन-देन दा सबबने शा भरोसेमंद मॉडल उपलब्ध करा करदा ऐ ते समाजी क्षेत्र दिएं बेहूतरीन नीतिएं राएं नागरिकें दा सशक्तिकरण करा करदा ऐ। प्रधानमंत्री होरें आखेआ जे पिछले 10एं ग'रें च भारत नै जिस रफतार कन्ने विकास कीता ऐ उसी दिक्खियै पूरी दुनिया रहान ऐ। उनें आखेआ जे दुनिया भरै थमां भारत औने आले लोक हुन आखदे न जे भारत बदला करदा ऐ। उनें आखेआ जे भारत च एहू बदलाव शड़ा बवस्था ते बुनियादी ढांचे च गै

नेई आया ऐ सगुआं हर इक नागरिक ते नोजवान दे अंदर बी एहदी झलक सु दिक्खने गी लब्धा करदी ऐ।

<><><><><><>

Modi-Russian

प्रधानमंत्री नरेन्द्र मोदी होरें अज्ज मोस्को च अलू रशियन एकजीबिशन सेंटर नांदे दे नमैश दा दौरा लाया। उंदे नै रूस दे राष्ट्रपति ब्लादिमीर पुतिन होर बी हे। दोनें नेताएं नमैश केन्द्र च रूस्तम पवीलियन दा बी दौरा लाया। श्री मोदी होरें सिविल परमाणु ऊर्जा दे क्षेत्र पर आधारित भारत-रूस सैहयोग गी समर्पित इक फोटू नमैश बी दिक्खी। उनेंगी एटमिक सिमुमनी जेहूड़ा जे वीवीईआर-1000 रियक्टर दा इक पक्के तौरा पर कम्म करने आला नमूना ऐ जेहूड़ा जे भारत च खुदनखुलम परमाणु उर्जा संयत्र दा केन्द्र बी ऐ गी दस्सेआ गेआ। प्रधानमंत्री मोदी होरें पवीलियन च भारतीय ते रूसर विद्यार्थिएं दे किट्ठ कन्नै बी गल्लबात कीती। उने, उनेंगी विज्ञान ते टैक्नालोजी दे क्षेत्र च भविक्ख दिएं संभावनाएं गी तलाशने दे बारे प्रेरित कीता तां जे भविक्ख आलिएं पीढ़ियेंग ी एहदे नै लाह हासल होई सकै। गौरतलब ऐ जे रूस्तम पवीलियन जिस दा नवम्बर 2023 च उदघाटन होआ हा वैज्ञानिक ते टैक्नालाजी सरबंधी विकास आले इतेहास च सब्बने शा बड्डी नमैश चा इक ऐ।

<><><><><><>

Prez-Terror Attack

राष्ट्रपति द्रौपदी मुर्मू होरें कटुआ च फौज दी कानवाई पर होए दे आतंकी हमले पर गैहरा दुख प्रगट करदे होई आखेआ ऐ जे इस बुजदलाना हरकत दी सख्त निंदेआ कीती जानी लोडचदी ऐ ते इस चञ्जाली दिएं वारदातें गी अंजाम देने आलें कन्ने तगड़ेयाई कन्नै निबड़ेआ जाना लोडचदा। अपनी इक सोशल मीडिया पोस्ट पर राष्ट्रपति होरें आखेआ जे अपनी जिंदू दा बुलिदान देने आलें इनें बहादुरें दे

परोआर आले कन्नै उंदी पूरी हमदर्दी ऐ जेहड़े आतंकवाद दे हर रूप दा तगड़ेयाई कन्नै मकाबला करने लेई दिन रात डटे दे रौहदे न। राष्ट्रपति होरें इस हमले च घायल जवानें दे तौले नरोए होने लेई प्रार्थना कीती।

<><><><><><>

Rajanth Army

रक्षामंत्री राजनाथ सिंह होरें बी कठुआ जिले च होए दे आतंकी हमले च भारतीय फौज दे 5 सैनिकें दे जानी नुकसान पर गैहरा दुख प्रगट कीता ऐ। उनें आखेआ जे दुखै दी इस घड़ी च समूलचे राष्ट्र शहीदें दे परोआरें कन्नै खड़ोते दे दा ऐ। उनें दस्सेआ जे आतंकवाद रोधी कारवाइयां बरोबर जारी न ते साढ़े सैनिकें समूलचे खित्ते शांति, रमानदारी ते खुशहाली आनने दी पक्ख घेआई दी ऐ। रक्षा मंत्री होरें घायलें दे तौले नरोए होने दी प्रार्थना कीती। तोआई फौज नै पुंछ जिले दे कृष्णा घाटी सेक्टर च नियंत्रण रेखा दे कोलां दा इक पाकिस्तानील ड्रोन गी दिक्खियै ओहदे पर गोली चलाई जेहदे पर ओ पाकिस्तान दे कब्जे आले इलाके च वापस उठी गेआ। एहदे बाद फौज नै उत्थें तुनाई कारवाई शुरू कीती तां जे एह जमीनी बनाया जाई सकैजे इस ड्रोन नै कोई थेआर जां होर कोई चीज ते उत्थें नेई सुट्टी की जे मती बारी पाकिस्तानी कब्जे आले इलाके थमां थेआर जां नशीले पद्धार्थे इत्त बक्खी पुजाए जंदे न। जम्मू कश्मीर पुलसै बन्ने पारा औने आले ड्रोंस दे बारे च कोई जानकारी देने आलें लेई 3 लक्ख रपे दे इनाम दी घोषणा कीती दी ऐ।

<><><><><><>

Prez. Bhubneshwar

राष्ट्रपति द्रौपदी मुर्मू होरें नैशनल इंस्टीच्यूट ऑफ सांइस एजेंकेशन एंड रिसर्च एनआईएसईआर दे विद्यार्थिणं गी मनुक्खता ते राष्ट्र लेइ अपनी शिक्षा ते ज्ञान दा इस्तेमाल करने लेई आखेआ ऐ। अज्ज दपैहरी मगरा भुवनेश्वर च इंस्टीच्यूट दे 13में स्नातक समारोह गी संबोधत करदे होइ राष्ट्रपति होरें स्नातक दी डिग्री पूरी

करने आले विद्यार्थिं गी ममारकबाद दिल्ली ते उनेंगी संबोधत करदे होई आखेआ जे ओ अपने अपने क्षेत्र च बेह्तरीन कम्म करदे होई देसै लेई मान ते उपलब्धियां हासल करन। उनें शिक्षा गी अमृत दे बरोबर करार दिंदे होई आखेआ जे भारतीय वैज्ञानिक सर सी.वी.रमण ते खगोल विज्ञानी, गणितज्ञ ते विद्वान पठानी समंता जनेह महान हस्तिएं दे निर्माण च बी शिक्षा दा गै योगदान ऐ। अजे गी द्रौपदी मुर्मू होरे विद्यार्थिं गी आग्रह कीता जे ओ पढाई ते अनुसंधान दे दरान विज्ञान ते तकनीकी दा गलत इस्तेमाल नेई होए।

<><><><><><>

Pradhan Education

केन्द्री शिक्षा मंत्री धर्मेन्द्र प्रधान होरे राज्ये ते केन्द्र शासत प्रदेशे कोला सैहयोगात्मक शिक्षा बवस्था तैआर करने लेई रलिमिलियै कम्म करने दा आह्वान कीता ऐ। ओह अज्ज नमीं दिल्ली रात्ये ते केन्द्र शासत प्रदेशे कन्ने स्कूली शिक्षा ते साक्षरता विभाग दी समीखा बैठक दे उद्घाटन समारोह गी संबोधत करा करदे हे। उनें स्कूली शिक्षा दे समग्र ते पूरे पराते विकास लेई अगले 5एं ब'रे दे खाके पर अपने बचार रखे। उनें आखेआ जे प्रधानमंत्री नरेन्द्र मोदी हुंदे विकसित भारत आले नजरियै दा शिक्षा इक महत्वपूर्ण थम्म ऐ। उनें राज्ये ते केन्द्र शासत प्रदेशे गी आखेआ जे इस सुखने गी मूर्त रूप देने लेई ओ किट्ठे रलियै कम्म करन। उनें आखेआ जे राश्ट्री शिक्षा नीति दी असरदार ढंगै सिर अमलावरी भारत गी ज्ञान दी इक महा शक्ति बनाने ते मयारी शिक्षा तगर बरोबर ते समावेशी पुज्ज गी जकीनी बनाने दी कुंजी ऐ।

<><><><><><>

CCPA Yatra

केन्द्रीय उपभोक्ता सुरक्षा प्राधिकरणे इक आनलाइन यात्रा आले ऐप गी कोविड महामारी दे समे लॉकडाउन दे चलदे उपभोक्ताएं आस्सेआ आनलाइन तरीके नै यात्रा बुक कराने ते यात्रा रद्द होने ताई बुकिंग दी रकम वापस परताने लेई

निर्देश दित्ते न। उपभोक्ता मामले मंत्रालय नै आखेआ जे सीसीपीए दे ध्यान च राष्ट्रीय उपभोक्ता हैल्पलाइन राएं एह गल्ल आई ऐ, हवाई टिकटें गी बुक कराने ताई पैहे वापस नेई परताने दे सरबंधे च केई सारियां शकैता दर्ज होइयां हियां। ब'रे 2020 च अपेक्स कोर्ट नै आखेआ जे अगर एह अिकटां लॉकडाउन समें दरान ट्रेवल एजेंट राएं बुक होइयां न, हवाई सेवा आलिं एयरलाइनस गी तुरत गै पूरा पैहा वापस देना लोडचदा ऐ। एहदे च आखेआ गेआ ऐ जे इनें मुद्दें उप्पर सीसीपीए ने जुलाई 2021 थमां जुन 2024 तोड़ी मतियां सारियां सुनवाइयां कीतियां न। गोरतलब ऐ जे 2 करोड़ 50 लक्ख रपे यात्रा थमां अजें बी वापस परताने न ते कोई 23 करोड़ रपे उपभोक्ताएं गी वापस देई दित्ते दे न।

<><><><><><>

Uttarakhand CM

उत्तराखंड दे मुख्यमंत्री पुष्कर सिंह धानी होरें अज्ज राज्य दे कुमाउ खित्ते दे हाड़ प्रीणावित इलाकें दा जमीनी सतह उप्पर जायजा लैने लेई हवाई सर्वेक्षण कीता। 7 ते 8 जुलाई गी भारी बरखें करी उधमसिंह नगर ते चम्पावत जिले दिं किश थाहरें च पानी किट्ठा होने करी हाड़ आले हालात बनी गे। उधम सिंह नगर दी खतिमा ते सितारगंज च कोई 1 ज्हार 4 सौ कोला मते लोकें गी बचाया ते सुरक्षत थाहरें पर आन्नेआ गेआ ऐ। चम्पावत जिले दी पुरनागिन तैहसील थमां बी 150 परोआरें दे कोई 400 लोकें गी सुरक्षत कड्डेअ । गेआ ऐ। अजें तोड़ी इलाकें दे कोइ 120 प्रभावत लोकें गी कोइ 6 लक्ख रपे दी मदाद गी बंडेआ जाई चुके दा ऐ। तोआई मोसम विभाग नै राजय च कल भारी बरखें लेई येलो अलट्र जारी कीता ऐ।

<><><><><><>

Hathras-Arrest

उत्तर प्रदेश सरकार नै विशेष जांच टीम आस्सेआ सोंपी दी रिपोर्ट दे बाद हाथरस भीड़-भगदड़ मामले च 6 अधिकारिं गी मुअत्तल कीता ऐ। विशेष जांच टीम नै अज्ज अपनी रिपोर्ट सोंपी जिस च दस्सेआ गोआ ऐ जे हादसे पिच्छें दा मुख कारण कार्यक्रम आयोजित करोआने आलें तरफा दस्सी दी अनदिकखी दस्सी जा'रदी ऐ। एसआईटी दी रिपोर्ट दे आधार उप्पर 6 जनें जिस च एसडीएम, सीओ ते हाथरस जिले दे तैहसीलदार गी मुअत्तल करी दित्ता गोआ ऐ। आकाशवाणी संवाददाता दी रिपोर्ट मूजब एसआईटी नै मकामी प्रशासन गी बी जवाबदेह ठैहराया ऐ। दो मिबरी एसआईटी ने आखेआ जे साजश तांइ इंकार नेइं कीता जाई सकदा मगरा एहदी डूहंगी सतह उप्पर जांच होनी लोड़चदी ऐ। रिपोर्ट च आखेआ गोआ ऐ जे कार्यक्रम आयोजित करोआने आले लोकें दे किट्ट लेई पूरे इंतजाम नेईं कीते गे दे हे। एसआईटी मिंबरें 2, 3 ते 5 जुलाई गी हादसे आली थाहर पुज्जे हे ते कोइ 125 लोकें गी रिपोर्ट दाखल करोआने सरबंधी सुआल जुआब कीता। रिपोर्ट दी बिनाह उप्पर सरकार नै एसडीएम, तैहसीलदार सर्कल अफसर, एसओ ते सिकंदराराओ दे दो होरने पुलस अफसरें गी मुअत्तल कीता।

<><><><><><>